

Bond

I

Farai un vers, pos mi sonelh,
e·m vauc e m'estauc al solelh.
Donnas i a de mal conselh,
e sai dir cals:
cellas c'amor de cavalier
tornon a mals.

II

Donna non fai pechat mortal
qe ama cavalier leal,
ams si es monges o clergal
non a raizo!
Per dreg la deuria hom cremar
ab un tezo.

III

En Alvergnhe, part Lemozi,
m'en anei totz sols a tapi;
trobei la moiller d'en Guari
e d'en Bernart;
saluderon mi sinplamentz
per Sant Launart.

IV

La una·m diz en son latin:
"O, Dieus vos salv, don pelerin;
mout mi senblatz de belh aizin,
mon escient,
mas trop vezem anar pel mond
de folla gent."

V

Ar auzires c'ai respondutz:
anc no li diz ni ba ni butz,
ni fer ni fust no ai mentagutz,
mas sol aitan:
"Babariol, babariol,
babarian."

VI

So diz n'Agnes a n'Ermessen:

"Trobat avem qe anam qeren;
sor, per amor Deu l'alberguem,
qe ben es mutz
e ja per lui nostre conseilh
non er sabutz."

VII

La una·m pres sotz son mantel
e mes m'en la cambr'al fornèl;
sapchatz q'a mi fo bon e bel,
e·l focs fo bos,
et eu calfei me volentiers
als gros carbos.

VIII

A manjar mi deron capos --
e sapchatz, agui mais de dos! --
e no·i ac cog ni cogastros
mas sol nos tres;
e·l pans fo cautz e·l vins fo bos
e·l pebr'espes.

IX

"Sor, s'aquest hom es enginhos
ni laissa a parlar per nos,
nos aportem nostre gat ros
de mantenent,
qe·l fara parlar az estros
si de re·nz ment."

X

N'Agnes anet per l'enoios
e fo granz et ag loncz guinhos
et eu, can lo vi entre nos,
aig n'espavent,
qe a pauc non perdei l'amor
e l'ardiment.

XI

Qant aguem begut e manjat,
eu mi despoillei per lor grat;
detras m'aporteron lo chat
mal e felon;
la una·l tira del costat
tro al tallon.

XII

Per la coa de mantenèn
tira lo quat e l'escoisen;
plaias mi feron mais de cen
aqella ves;
mas eu non mogra lengua ges

qi m'ausizes!

XIII

So diz n'Agnes a n'Ermessen:
"Mutz es, qe ben es conoissen;
sor, del bainh nos apareillem
e del sojorn."
Ueit jorn ez ancar m'en estei
az aqel torn.

XIV

Tant las fotei com auziretz:
cen e quatre vint et ueit vetz!
qe a pauc no·i rompet mos conretz
e mos arnes,
e no·us pues dir lo malaveig
tan gran m'en pres.

XV

E no·us sai dir lo malaveig
tan gran m'en pres.

- letto 1102 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/bond-4>